



SIARAN AKHBAR

KEMENTERIAN KESIHATAN

PERUTUSAN

YANG BERHORMAT DATO SERI SETIA DR HAJI MOHAMMAD

ISHAM BIN HAJI JAAFAR

MENTERI KESIHATAN

SEMPENA SAMBUTAN HARI KESIHATAN SEDUNIA 2026

7 APRIL 2026

TEMA:

"Bersama Untuk Kesehatan. Teguh Bersama Sains"
"Together for Health. Stand with Science"

1. Setiap tahun pada 7 April, seluruh dunia termasuk Negara Brunei Darussalam akan menyambut **Hari Kesehatan Sedunia** atau ***World Health Day*** bagi memperkukuhkan kesedaran dan komitmen terhadap kesihatan dan kesejahteraan masyarakat. Pada tahun ini, Pertubuhan Kesihatan Sedunia (WHO) telah memilih tema "**Bersama Untuk Kesehatan. Teguh Bersama Sains**" (***"Together for Health. Stand with Science"***), yang menyeru semua pihak termasuk kerajaan, saintis, agensi berkepentingan, dan seluruh masyarakat untuk memilih bukti, mempercayai fakta, dan menyokong tindakan berasaskan sains demi kesihatan manusia, haiwan, dan alam sekitar kita. Tema ini amat selaras

dengan hala tuju yang telah diambil oleh Negara Brunei Darussalam dalam memelihara kesihatan rakyat dan penduduknya.

2. Kementerian Kesihatan percaya bahawa cabaran kesihatan pada zaman ini termasuk kemunculan penyakit berjangkit yang baru, rintangan antimikrob, perubahan iklim dan kerosakan alam sekitar adalah tidak dapat ditangani oleh mana-mana sektor secara bersendirian. Ancaman-ancaman ini merentasi sempadan antara kesihatan manusia, kesihatan haiwan, dan ekosistem kita. Semua ini memerlukan satu respons yang bersepadu, berteraskan sains, dan bersifat kolaboratif. Inilah asas kepada pendekatan ***One Health*** — satu rangka kerja yang bersepadu yang mengiktiraf bahawa hubungan di antara kesihatan manusia, haiwan, tumbuhan, dan ekosistem adalah tidak dapat dipisahkan. *One Health* bukan sekadar satu konsep; ia adalah komitmen untuk bekerja merentasi kementerian, disiplin, dan sempadan bagi membina sebuah negara yang lebih sihat dan lebih berdaya tahan.

3. Negara Brunei Darussalam telah mengambil langkah-langkah yang konkrit dalam memajukan agenda *One Health* di peringkat nasional. Pada bulan April 2025, Kementerian Kesihatan telah berjaya menganjurkan bengkel ***National Bridging Workshop*** dengan sokongan daripada organisasi-organisasi *Quadripartite* iaitu Pertubuhan Kesihatan Sedunia (WHO), Pertubuhan Dunia untuk Kesihatan Haiwan (WOAH), Pertubuhan Makanan dan Pertanian Pertubuhan Bangsa-Bangsa Bersatu (FAO), serta Program Alam Sekitar Pertubuhan Bangsa-Bangsa Bersatu (UNEP). Bengkel ini telah mengumpulkan lebih daripada 60 orang pakar dan pegawai daripada sektor kesihatan manusia, haiwan, dan alam sekitar di Negara Brunei Darussalam.

4. Bengkel yang diadakan selama tiga hari ini telah mengumpulkan para peserta untuk bekerjasama dan seterusnya mengenalpasti kekuatan dan jurang yang sedia ada dalam komunikasi, perancangan, dan tindak balas kecemasan merentas sektor. Melalui senario seperti wabak penyakit zoonotik dan ancaman alam sekitar, para peserta mendapat gambaran yang lebih jelas tentang bagaimana sektor-sektor berinteraksi dan dimana kerjasama boleh dipertingkatkan. Bengkel ini berakhir dengan pembangunan secara bersama sebuah **pelan hala tuju** atau **roadmap** yang jelas dan boleh dilaksanakan dengan tanggungjawab yang ditetapkan oleh pelbagai sektor dan akan membimbing pelaksanaan bersepadu aktiviti-aktiviti *One Health* di Negara Brunei Darussalam.

5. Kementerian Kesihatan dengan kerjasama WHO, FAO, dan WOAHA juga baru-baru ini telah menganjurkan bengkel ***One Health Zoonotic Disease Prioritisation Workshop*** pada bulan Februari 2026. Bengkel ini telah dihadiri oleh wakil-wakil daripada sektor kesihatan manusia, kesihatan haiwan, dan alam sekitar bagi mengenalpasti penyakit-penyakit zoonotik yang paling membimbangkan di Negara Brunei Darussalam. Melalui satu proses yang berstruktur dan berasaskan bukti, para peserta telah menilai penyakit-penyakit berdasarkan potensi kesannya terhadap kesihatan awam, kesihatan haiwan, dan alam sekitar. Hasil bengkel ini akan memaklumkan strategi-strategi pengawasan, persediaan, dan tindak balas yang lebih disasarkan, bagi memastikan sumber-sumber yang terhad digunakan di tempat yang paling diperlukan dan semua sektor selaras dalam menentukan keutamaan masing-masing.

6. Tema Hari Kesehatan Sedunia 2026 mengingatkan kita bahawa kemajuan dalam kesihatan awam dibina di atas asas bukti saintifik dan kerjasama pelbagai sektor. Vaksin, sistem pengawasan penyakit, alat pengesanan awal, dan dasar kesihatan awam — semuanya adalah hasil sains dan kerjasama. Apabila kita berpegang kepada sains, kita memilih untuk melindungi dan menyelamatkan nyawa. Oleh itu, Kementerian Kesihatan menyeru agar semua pihak untuk sentiasa mempercayai maklumat yang berasaskan sains dan menolak penyebaran maklumat yang salah, terutama sekali dalam era perkongsian maklumat digital yang pantas ini.

7. Kesihatan bukan sahaja tanggungjawab kerajaan dan petugas kesihatan, ia adalah tanggungjawab bersama dan kita semua memainkan peranan yang penting untuk menjaga kesihatan masing-masing. Kementerian Kesihatan menyeru agar setiap rakyat dan penduduk Negara Brunei Darussalam untuk mempercayai dan bertindak berdasarkan bukti saintifik bagi melindungi kesihatan diri sendiri dan orang-orang yang tersayang. Masyarakat juga digalakkan untuk menyokong program vaksinasi, langkah-langkah kesihatan awam, dan penggunaan ubat-ubatan yang bertanggungjawab, terutamanya antimikrob atau *antibiotics* demi memelihara keberkesanannya untuk generasi akan datang.

8. Tema "Bersama Untuk Kesihatan. Teguh Bersama Sains" ("*Together for Health. Stand with Science*") adalah inti pati daripada usaha berterusan kita untuk memastikan setiap rakyat dan penduduk di Negara Brunei Darussalam menikmati kehidupan yang sihat, selamat, dan sejahtera. Dengan kerjasama semua pihak termasuk kerajaan, sektor swasta, masyarakat, profesional kesihatan dan dengan sokongan rakan-rakan

antarabangsa dari WHO, WOAHA, FAO, UNEP, Insya Allah, kita akan dapat membina sebuah masyarakat yang mempunyai masa depan yang lebih sihat, lebih berdaya tahan, dan lebih cerah untuk generasi akan datang.

-TAMAT-